

Saget der Königliche Prophet in seinem
 herrlichen CIII. Psalm: **W**ie sind deine Werck so
 groß/ vnd so viel/ du hast sie alle weißlich geordnet/ vnd die
 Erde ist vol deiner Güte. Im CXI. Psalm/ Groß sind die
 Werck des **H**Ern/ wer ihr achtet/ der hat eittel lust daran / vnd ist ja
 freylich ein Wunderbarlicher Gott/ in allen seinen Wercken / welches
 wir in allen dingen/ vnd auch in allen örten wol würden sehen / wenn
 wir nur unsere Augen aufscheten/ vnd seine Werck vnd Geschafft/ recht
 ansehen / darzu dann vns auch der LXVI. Psalm. vermanet/ da er sa-
 get: Komet her/ vnd sehet an die Wercke **G**ottes/ der so wunderbarlich ist
 mit seinem thun/ vnter den Menschen Kindern. Vnter welchen auch/
 nicht das geringste/ das Edle Land Preussen ist / das wenn man nur
 ansiehet diese Preusche Mappen/ so siehet man/ ja wie der liebe fro-
 me Gott/ vnd Vater/ es so wunder schön geschaffen/ vnd für vielen an-
 dern Ländern/ mit vielen herlichen/ nutzbarlichen/ fischreichen/ fließern/
 strömen / vnd Seen gezieret/ vnd begabet hat/ daran dann die schönen
 herlichen Wälder vnd Wiesen liegen / darneben die köstliche/ fruchtbare
 Ecker/ nicht auff einerley art vnd weis/ sondern mancherley/ vnd also
 wunderbarlich vermengert/ jekunder ein solches/ bald ein anders/ bald
 aber ein ander Erdreich hat / auff das man nicht zwey oder dreyerley
 Getreide/ sondern allerley/ mit nutz vnd fruchte/ seen vnd bayen mö-
 ge. Denn wie es die tegliche erfahrung gibt / einerley Erdreich/ treget
 nicht allerley Getreide/ dann ein sehr strenger Leime/ treget nicht leicht-
 lich Rocken/ Gersten/ Heydenkorn/ etc. sondern guten Weizen/ Ha-
 bern/etc. Dargegen ein guter milder grandiger oder was sendiger Acker/
 treget auch nicht leichtlich guten Weizen vnd Habern/ sondern Rocken/
 Gersten etc. So wollen ehliche fruchte als Erbeissen/ einen mittelmessi-
 gen grund haben/ darauff dann ein Feldman/ nicht allein achtung ha-
 ben mus/ sondern auch auff die zeit vnd örter: Dann an ehlichen ör-
 tern gedeyet das frü Wintergetreide am besten/ an ehlichen vnd sonder-
 lichen/ wo es sehr sandig ist/ mus man den Rocken vmb Martini aller-
 erst seen. So wil bey vns an ehlichen orten / wol in einem Felde vnd
 stücke/ die Gerste im voriahr in der 13. oder 12. wochen/ die andere erst in
 der 8. oder 7. wochen/ für Jacobi geseet sein / so gibts frucht vnd nutz-
 barkeit/ so fein hats Gott geschaffen vnd geordnet / damit wir auch in
 diesen kalten Ländern fort mögen komen/ vnd nicht alles auff eine zeit
 dörfen thun.

Gottes
 Wercke
 Gros/
 vnd viel

Viel schön-
 ner Strö-
 me vnd
 See.
 Wiesen vñ
 Acker.

Ungleich-
 heit der
 zeit zu see-
 en.

Andere herligkeit vnd nutzbarkeit/ so dieses Land auch für andern
 Ländern hat/ wil ich jekunder alhie/ vmb kürz willen schweigen / weil
 ich solches zum theil zuuohren/ doch auch kürzlich / im Büchlein von
 alten Preussen gedacht hab.

Ich hab aber solches Edles Land in meiner Preuschen Mappen
 lang noch nicht beschrieben/ wie es an sich selber ist/ ist auch vnmöglich /
 in einen solchen kleinen Brieff zubringen/ dann ich nur das fürnehmste
 daran was gelegen ist/ gesezt hab/ viel See sein ausgelassen / desglei-
 chen auch viel Dörffer vnd Edelhöffe / dann ich nurn der Stedte/

In der
 Mapp-
 nicht alle
 Dörffer
 gesezt.

A

Schlösser